

欽定剿平三省邪匪方略

欽定剿平三省邪匪方略正編卷四十五

丁巳年

七月十九日

丙戌

額勒登保福寧奏言賊匪自竄

至帽子山城口一帶後

臣

等督率官兵連日在

下麥莊一帶悉力攻擊後路之兵甫經到齊初

五日四鼓

臣

額勒登保督同張廷彥薩克坦布

等發兵從帽子山南面繞道攀援天甫黎明上

至石柱嶺賊人放鎗抵禦並亂擲石塊我兵搶

至嶺巔賊匪驚竄滾崖及受鎗箭死者甚多此
嶺與帽子山緊靠中隔深溝對面山坡陡立賊
匪已於要路設有木石遂令張廷彥帶兵於石
柱嶺紮營並將附近營卡酌量移駐分堵

臣福

寧亦於是日四鼓帶同綸布春等從帽子山西
面覓道上鑼鍋圈連克賊卡二座殲殺賊匪二
十餘人賊匪吹角聚衆蜂擁下撲綸布春等帶

兵擊退卽於鑼鍋圈要處擊卡

臣

額勒登保於

初五日晚仍回下麥莊查下麥莊過溪有腰帶

崖三層方上帽子山

臣

等卽於初六日四鼓分

路各帶巴圖魯侍衛官兵等攻擊下腰帶崖上

崖俱係石壁高自四五丈至二三十丈不等孫

清元楊秉昭劉瑞等帶奮勇弁兵用木梯繩索

接遞密上賊匪猝不及防於五鼓時上至第一

層腰帶崖將賊匪所佔房屋及搭蓋卡座盡行
焚燒黎明我兵齊上乘勢欲攻第二層腰帶崖
賊匪聚衆抗拒楊秉昭被擣石猝擊陣亡弁兵
亦多受傷遂卽撤回將生擒賊目杜紹奇及賊
匪王學貴等六名逐加研訊據供此時係林之
華一人用事從白魚寨逃竄被官兵截殺頭目
先鋒甚多器械亦多拋棄昨到帽子山城口子

時林之華使人下溝看其墳墓知已發掘口稱
我已無處逃生內有頭目鄧伯春欲私約所帶
之人潛出投順有人洩漏林之華將其家屬概
行細縛等語當俱寸磔查賊人佔據之山固屬
陡峻而我兵周圍營卡無不扼要其城口子西
北之大合山猴子坡等處已派汪啟駐守北面
蜈蚣山一碗水等處關騰帶兵分駐自北而東

之中溪夜游山莫家州等處慶溥帶兵分駐直
接張廷彥所紮之營卡聲勢聯絡賊亦難於逃

遁

臣

等嚴諭各路鎮將晝夜防範彼此相顧一

面籌酌趕緊進剿再接據宜昌府知府王春煦
稟報川匪自九鎮河焚掠而下在巴東之火峯
觀音塘一帶燒搶巴東縣治濱臨大江南岸川
匪雖在北岸滋擾距縣治僅三十餘里已飛移

歸州水師遊擊俞國魯等帶兵二百名相機防堵並飭該州縣廣集鄉勇擇要堵截臣等當卽飛行知會宜綿汪新卽速添調官兵赴各該州縣截堵一面飭令遊擊金積福帶領兵勇二百名星夜趕赴巴東江之南岸探明堵剿復令提督文圖帶兵一百名星夜密行趕赴宜昌歸州一帶督率兵勇迎頭截剿

同日汪新奏言

臣

於十二日在荊州途次接據

宜昌府稟報賊匪大夥由歸州龔家橋突撲興

山縣之伍家坪南垭等卡縣治向無城郭已被

焚掠賊勢似向東趨該縣東南與東湖當陽接

壤北與保康房縣接壤由興山而趨當陽信宿

可達卽近荊州房保而東則近南漳襄陽宣城

西近竹谿竹山等處路路可通楚匪素所熟悉

業已飛飭速招鄉勇各於本境擇要堵守又將
前次備調之督撫標兵四百名飛飭叅將劉善
承帶赴房保迎頭堵截其東湖當陽一路現囑
副都統德福卽挑荆營滿兵一赴交界駐守扼
其來路一赴萬城隍駐紮以防盜決正在設法
籌禦間適接明亮德楞泰札會帶兵馳抵歸州
賊已竄至興山現卽併力兜剿臣以賊蹤飄忽

無定大兵自後追壓勢必伺間狂奔若西向竹谿竹山則均係山僻險隘賊入陷奔圍剿尙易若東向當陽南漳則逼近荆襄迤下各處無險可守已飛咨明亮等囑卽統兵抄赴賊前將此大夥賊衆兜回竹谿竹山一百分咨劉君輔馬塢各帶原兵由大寧折回攔截以期驅入山險合圍掩擊其巴歸等處業被殘破卽有零星餘

匪尙可緩爲剿辦

臣

俟料理軍火糧餉粗定過

赴富陽宜昌親身策辦再查湖北各營官兵上

年調赴湖南剿平苗匪後尙留一千餘名駐守

彈壓此時苗衆業已輸誠

臣

已密札鄂輝姜晟

囑其察看苗疆情勢如果寧帖無虞迅將楚北

原調赴南各兵悉數遣回此外或尙有兵可撥

亦卽另籌撥赴以資協剿捍禦均奏入

上命軍機大臣傳諭宜綿明亮額勒登保德楞泰惠齡汪新王文雄曰前此賊匪在黃柏山芭葉山兩處困守官兵四面圍住賊匪仍復潰圍竄逸此次帽子山等處被圍之賊額勒登保等當嚴密堵截並勉力尋覓間道趕緊進剿不得因賊匪據險死守坐待其食盡自斃陣亡都司楊秉昭著咨部加等優卹其陣亡及受傷弁兵亦著咨部優加賞卹

再據訊獲匪供稱賊中係林之華一人用事並未提及覃加耀該犯作何下落必須一併擒獲勿使竄匿至川楚竄匪直趨歸州明亮德楞泰聞信卽從水路趕至兜剿所辦尙合機宜今賊匪復向興山一帶奔竄明亮等若能迎頭兜剿擒獲首逆固屬甚善卽賊匪尙在奔竄明亮等當緊躡賊蹤使之無暇焚搶奔走疲乏自可易於剿洗汪新將留

駐湖南兵丁一千名調回所見甚是王文雄近在
南陽著卽速赴楚省探明賊蹤迎頭夾擊汪新又
已酌派督撫標兵及滿兵到東湖當陽萬城堤一
帶防堵賊匪自不敢再向荆宜窺伺明亮等又帶
大兵下壓於竹山竹谿險隘處所四面合圍卽可
殲戮無遺至據奏飛咨劉君輔馬塢各帶原兵由
大寧折回攔截興山竄匪大寧一路賊匪劉君輔

馬瑀與惠齡等會合夾擊正當喫緊之際未必卽能折回惠齡等務當將黑樓門一帶新起之賊速行撲滅卽赴觀成一路將老木園之賊併力剿捕殲淨餘黨訖赴宜綿一路協剿

二十二日

巳丑

汪新奏言查楚陝教匪自闖入川

境以後卽與達州之賊合夥人數頓至數萬分股四擾復有新起之賊響應愈多現在頭股賊

首齊王氏等由歸巴擾至興山者約二萬餘人
明亮德楞泰等現擬分路援剿賊匪又由興山
擾至南漳交界之後界坪距襄郡信宿可達該
郡爲南北扼要重鎮現在存城之兵止三百數
十名多係挑剩病兵難資守禦本省旣無可調
撥因思豫省南陽鎮距襄甚近現卽飛咨景安
速撥該鎮兵五六百名馳赴襄陽紮駐藉以阻

扼賊勢卽所以保衛河南臣思賊數日益加增

各路官兵統計固不下鉅萬處處均須留防卽
爲牽掣現在明亮等軍營祇有兵五千餘名而
賊匪另股竄擾南漳其勢萬難分投馳截且探
聞屯集大寧賊匪因大兵逼剿復向東竄劉君
輔馬瑀等協力堵截兵力較單恐致竄入竹谿
竹山是賊匪大夥分兩路而來荆宜襄鄖四郡

隨在兵守空虛且地多平行路徑紛歧均係楚
匪素所熟習之處現雖飭集鄉勇設卡嚴防祇
可藉衛本鄉因思昨奉發吉林索倫兵三千名
莫若卽令渡漢而南急殲逆氛懇

恩飭催此項勁兵趲程前進

臣

並飛咨惠齡阿哈保

帶領前起官兵迅由襄陽趕明亮等軍營協剿

奏入

上命軍機大臣傳諭明旨元德楞泰惠齡汪新姜晟鄂
輝曰襄陽爲漢江南北扼要之區竄匪若從南漳
向東北滋擾勢必逼近又襄陽郡城此時汪新竟應
從當陽回至襄陽駐劄曉諭附近各村莊團練鄉
勇並激勵紳士分投招募義勇與官兵防堵如賊
匪竟敢直逼郡城務當督率兵勇悉力堵剿以遏
其北竄之路現催令吉林索倫官兵迅速行走並

令惠倫等迅抵襄陽又添派山西兵二千名速赴
助剿其湖南協防官兵一千名著姜晟鄂輝速飭
將領帶回北省似此軍威壯盛汪新總當持以鎮
定至明亮德楞泰因截剿後股石門牛口賊匪以
致頭股乘間東竄惟當將後股賊匪剿淨趕赴南
漳緊躡賊蹤奮力截剿其大寧新起賊匪欲與老
木園合夥前經劉君輔馬瑀等擊退惠齡恒瑞慶

成等又由于溪口一路前往夾擊務當上緊兜剿
不可再令東竄擾及一竹爲要

上又命軍機大臣傳諭景安蔣兆奎曰川省教匪現
由歸州竄至南漳距襄陽不遠亟需兵力堵截因
思山西省前曾調兵二千名在豫省協同防堵嗣
經寧謐撤回如此項兵丁俱在附近豫界營伍蔣
兆奎卽派明幹將弁帶領迅赴南陽交與景安探

聽襄陽一帶何處緊要卽飭令速往幫剿若前項
撤回兵丁係省北大同等處邊營蔣兆奎卽當於
豫境毗連標營內先派二千名赴豫聽候調遣

王又命軍機大臣傳諭惠倫琳寧秀林曰川匪擾至
湖北南漳邊界明亮德楞泰一時不能趕赴需兵
甚亟著惠倫等卽迅往襄陽一帶訪詢如明亮等
已繞至賊前卽可隨同擊剿倘明亮等猶在賊後

追逐惠倫等卽會同王文雄帶領官兵堵禦攻圍
至前調之吉林索倫兵已起程者著該將軍等飭
令沿途加緊行走其尙未起程者迅速起程毋得
遲悞

二十四日

辛卯

景安奏言

臣

於裕州途次接准汪

新谷稱川省賊匪竄至興山縣境內現過保康

南漳之後界坪距襄陽甚近

臣

當卽飛咨王文

雄撥兵五百名攜帶軍裝器械派令游擊明德
都司施文奎帶領馳往襄陽協力防守而南陽
所屬如淅川鄧州新野唐縣均與湖北襄陽接
壤臣亦飛咨河北鎮總兵張文奇由西路陝州

盧氏帶兵七百名前來策應並咨會河臣李奉
翰派撥河標弁兵五百名分駐沿河一帶嚴密
稽察倘賊匪竄及豫境卽將黃河船隻提赴北

岸停泊賊匪斷難飛越又咨直隸山西督撫臣
各調兵一千名迅速前來河北聽候派撥防守
又許州爲省南咽喉要地復飛咨山東撫臣伊
江阿調兵一千五百名或二千名前來駐防以
遏賊匪北竄之路

同日汪新奏言

臣

前次奏懇派赴襄陽之吉林

索倫兵三千名乘騎馬匹爲數過多除照例折

給銀兩人夫外約計必需馬三千餘匹方敷應用楚北不產大馬各營額馬調撥一空民間土馬土騾難供臨陣馳驟之用且因運濟各路軍糧亦已購買殆盡是本境萬難猝辦現已飛咨直隸山西山東三省酌撥壯建大馬各一千匹迅解襄陽又飭藩司派委幹員弁給帶銀兩前赴山陝二省挑買壯健馬二千匹分起趕

解回襄以濟急需均奏入

上命軍機大臣傳諭梁肯堂景安伊江阿蔣兆奎汪
新曰此時各路大兵自北而南聲威壯盛賊匪聞
知自必仍行折回不敢復向東北奔竄但豫省地
勢平行與襄陽處處可通亦不可不豫爲籌辦景
安所辦俱屬妥協其咨調兵丁除山西省前已調
兵二千名毋庸再調外著梁肯堂卽於駐劄正定

備調兵內就近派兵一千名伊江阿於附近河南
營分照景安所調之數派委得力將備帶領迅速
赴豫並著景安酌量情形派往防堵亦不必指定
地方分駐如賊匪業經明亮德楞泰剿盡景安卽
可將新調各兵飛咨停止以節勞費至王文雄所
帶兵五百名未免較少著景安再行酌量添撥數
百名以資剿辦又據汪新奏籌備吉林索倫官兵

馬匹已降旨將今年出青官馬八千匹送赴豫省
交景安分撥豫楚儘敷官兵乘騎之用汪新應速
赴襄陽郡城帶領兵勇悉力防範不可稍事張皇
上又命軍機大臣傳諭烏爾圖那遜齊里克齊梁肯
堂景安汪新伊江阿蔣兆奎曰吉林索倫官兵到
楚協剿需用馬匹較多楚省現辦軍需頭緒繁多
恐無暇購買馬匹且一時難得良馬直隸山東山

西三省雖有營馬但奏撥不免需時因思現有豫
備進哨之官馬八千匹近在察哈爾地方著原派
出青之副都統烏爾圖那遜齊里克齊徑行送赴
豫楚應用毋庸再行購辦著梁肯堂卽派委明幹
大員前赴宣化一帶接送至豫妥爲照料此項馬
匹抵豫後著景安卽照汪新所奏之數撥給楚省
五千匹其餘三千匹留於豫省備用

臣等謹案軍營有徵調之事凡官兵等乘騎
馳驟需用馬力最關緊要此次剿辦邪匪多
在三省山險斗絕之處官兵兜截窮追以及
轉饟供億羸馬易疲乏而楚省又非所產是
以撫臣等酌擬於隣省購辦但亦緩不濟急
仰蒙

聖明指示令將預備進哨出青馬匹全數撥往既使

勁旅遄行足供驅策而經理軍需者亦不致
虞掣肘又免隣省購買之煩一轉移間事半功
倍

睿謨廣運洵所謂當其可之謂時者哉

二十五日壬辰宜綿奏言查燕子山等處賊匪自

連撲穆克登阿營卡經官兵痛加殲戮後似有
移動之意當派遊擊朱承茂等帶領兵勇暗赴

羅家崖埋伏舒亮會同訥音等由正路進攻燕
子山賊營穆克登阿督率副將王承勲等分擊
鹿頭山筆架山兩路賊卡各官兵亦經撲近卽
鼓勇直上匪衆四散奔逃我兵將賊寨放火燒
燬追殺數里朱承茂等伏兵從旁衝出殲戮
二百餘人生擒周世賢等十一名餘匪俱向蒲
家山奔竄該處更爲險峻現經舒亮穆克登阿

分兵暫駐復據土地切守兵拏獲賊匪周二娃
解營訊據供稱係徐添德等由巫山遣回邀約
燕子山等處賊匪前往合夥等語看來賊勢欲
向夔巫奔竄迤東雲安場一路爲通衢要路

臣

隨派總兵艾如文抽帶派防萬縣官兵馳往堵
截並札會舒亮穆克登阿等廵探路徑嚴密攻
圍

臣

帶領總兵索費英阿侍衛伊立布等卽日

移駐新店子以杜賊匪窺伺開縣之路至於川東

所屬州縣地方良民被脅者極多臣分飭總理

道府等將各路難民實力招徠趕緊分散口糧

搭棚棲止其未經蹂躪之處廣發告示俾令各

安本業如有迫脅入夥自行投首者訊明保釋

其方山坪賊匪據百祥朱射斗稟報朱射斗於

初五日督兵搶佔走馬嶺山梁是夜賊匪復至

營卡附近潛伏經兵勇知覺報信該匪等蜂擁
前來爭拔鹿角叅將王清弼都司吳璉等帶兵
衝出賊匪不能抵敵跌崖滾坎而逃我兵因黑
夜未及窮追初七日復有賊匪數千人由老道
嘴下寨經瞭哨兵勇探報隨經百祥飛派遊擊
圖興阿由萬解坪一路叅將增順由涂家崖一
路分投迎剿百祥率同遊擊王相龍等於大地

溝余家嘴一帶相機截殺賊匪並不接仗卽行
奔走我兵追至龍洞溝坎下賊兵奪路退逃計
斃賊匪九十餘名奪獲刀矛四十三件該處賊
巢週圍百有餘里路徑叢岐現在添募鄉勇設
法進攻

臣

查蒲家山賊匪不下萬餘人舒亮等

一路官兵共計五千餘名百祥朱射斗一路亦
祇四千餘名

臣

統領各兵如洮州土兵不耐暑

熱病亡甚多先已遣令回甘其餘除留防後路
外現存營盤祇有八百名因查順慶一帶前經
英善調派建昌鎮屬官兵八百名分撥駐劄防
護糧運刻下該處距賊稍遠此項防兵自應調
赴前敵至省標召募新兵技藝俱漸嫻熟亦可
調派五六百名來營協剿臣已分別檄飭並飛
檄甘省督提兩標及肅州河州等鎮屬共調兵

二千五百名撒拉爾回兵五百名咨明英善揀
派曾經出征勇往得力將備分起管領來川聽
候調遣並酌派鞏昌府知府朱爾漢沿途照料
催償以期迅速到營

宜綿又奏言達州武舉李遇春自邪匪起事之
初卽團聚鄉勇節次隨同官兵打仗殺賊極爲
勇往以致賊匪俱懷仇恨計尋報復茲據百祥

朱射斗稟報該武舉於閏六月二十五日在蓋
頂坪打仗奮勇爭先手刃數賊旋因遇伏被擄
爲賊衆戕害情形甚慘隨傳喚該武舉家屬向
加撫恤臣仍捐給銀一千兩以示激勸

同日明亮德楞泰奏言楚境巴歸一帶被賊匪
竄入焚搶忽分忽合臣等於初四日就現有船隻
先帶兵三千餘名趕抵歸州卽於紅土崖紮營

兇截賊匪直奔巴東鳳之石門大葉牛口等處
焚掠勢欲搶渡南岸佔據縣治先經派令總兵
達音泰木騰額由葉灘追擊兩次接仗擊斃三
百餘人賊始向龔家橋奪路竄回臣等正慮官
兵稍單適明興在夔巫督辦軍需趕雇船隻將
後起官兵二千餘名全數送到初八日早探得
賊匪合爲大隊移屯歸州之白馬灘歸坪黑石

坂涼風垵等處連接二十餘里均距州治甚近
人數不過萬餘

臣

等當卽移營白家山地方初

九日

臣

等率領侍衛將弁等帶兵進攻白馬灘

賊匪蜂擁出迎經官兵轟斃騎馬賊目七人乘

勢衝突自辰至申攻克賊營三座殺賊三百餘

人該匪俱向歸坪黑石坂奔竄初十日官兵移

營香溪逼近擎卡十一日黎明

臣

等復帶官兵

由黑石坂大路進攻派令達音泰回侍衛西拉
布等帶兵攻黑石坂東首木騰額同侍衛法依
當阿等帶領鄉勇一千名出小路抄上黑石坂
後山暗伏同知陳桂生等帶領鄉勇八百名在
黑石坂涼風埡適中之地設伏以截賊人接應
臣等三路並進賊人搖旗吶喊分投迎拒官兵
三面兜剿攪殺一處賊人欲思翻山逃逸經道

員陳蘭森同知德廉州同符元魁典史鈕正綱
等率領鄉勇自山後壓下鎗礮並發賊人不能
衝突官兵乘勝圍剿斃賊約五百餘人割獲首
級一百七十三顆生擒傅長彩彭正宗等十三
名正在剿殺之際涼風埡賊人由王家山一路
前來接應該匪行至王家山半坡同知陳桂生
知縣胡密鹽大使鄒潮從九職員周以燝等督

率鄉勇從山頂林內突出壓剿矢石俱下斃賊
七八十人生擒王大發等九名當將接應之賊
截回黑石坂賊人退至山半將沙土乘風簸揚
並分燃草把濃烟散布使官兵莫辨其所在

臣

等察其詭計知該匪等必乘間奔竄飭令官兵
分路攔截賊人俱由山腰曲徑及溝坎內紛紛
竄逸官兵趕上截殺復斃賊百數十人其先遁

之賊俱歸入涼風垭一處臣急欲乘勝圍剿詎

十四日進攻該匪等出而接仗者僅一千餘人

據獲賊供稱衆賊目等連日於夜間潛分數股

翻山越嶺至大峽會城一股衝開鄉勇卡隘前

去僅留此股賊匪在後臣等當飭官兵向前剿

殺該匪一見卽行敗竄竊思隨後追擊卽將此

股賊人剿盡而前遁之賊已遠反墮賊人奸計

並據宜昌府王春熙稟稱另有一股賊匪奔入
興山該處亦無城垣鄉勇堵禦不住是城匪時
分時合前竄者乘虛四出留後者牽綴官兵實
爲狡詐官兵總須抄出賊前方可攔截制勝連
日拏獲賊匪供稱兩路之賊約在宜昌荊州等
處會合總要同赴襄陽臣等莫若帶兵仍由水
路徑抵宜昌無論何路賊匪向何處奔逃均可

兜截若日內該匪奔過宜昌府城

臣

等竟順流

而下直至荆襄一帶迎剿可以遏賊人去路已

飭令知府嚴士鉉趕辦船隻三百餘號卽儘此

裝載官兵相機兜截又查歸州州治背依山麓

前臨大江旣無城垣又無險可守且聞川省燕

子山等處新起賊匪雖有舒亮穆克登阿截剿

亦有入楚會合之語查興肇所帶駐守白帝城

之滿兵一千名先經飛札抽調來營現已趕到
卽將此兵暫駐歸州州治以資鎮壓均奏入

上命軍機大臣傳諭宜綿明亮德楞泰曰宜綿軍營
現在存兵無多卽百祥朱射斗所帶之兵亦不過
四千餘名自不得不酌量添調官兵以資剿辦宜
綿檄調各營標兵均著照所請行看來楚匪均已
分竄湖北其開萬雲陽一帶皆係新起附從匪黨

宜綿等自當就現有兵力分投撲剿不可坐待新兵致稽時口至燕子山等處賊匪亦欲向巫山一帶奔竄舒亮等務當嚴密兜圍勿令合夥武舉李遇春被賊戕害殊爲可憫著咨部照陣亡例加等議卹仍令其子引見至明亮等仍由水路趕赴宜昌兜剿所辦尙合機宜但摺內祇稱賊匪擾及興山而汪新昨奏前股賊首齊王氏等已竄至保康

南漳之後界坪明亮等探明賊蹤自當由宜昌登陸徑赴南漳一帶緊躡追剿此時王文雄帶兵踵至汪新現駐襄陽郡城而湖南撤回之兵由辰州順流而下計已可到襄陽賊匪自不敢竄入若卽折回南遁則明亮等自宜昌而來正可迎頭截剿也

二十六日

癸巳

觀成劉君輔奏言楚匪竄擾大寧

沿途裏脅若竄合老木園或滋擾縣城辦理更
爲棘手查寶塔一帶係各路總匯要隘

臣

劉君

輔帶兵六百名卽於該處駐劄派遊擊王化龍
帶兵三百名於青莊坪駐劄鎮臣馬瑀副將白
守忠帶兵六百名於大寧城外山梁紮卡兩處
以爲倚角閏六月二十七日五更黑樓門賊匪
千餘人搖旗吶喊直撲青莊坪卡隘王化龍督

兵抵禦忽有騎馬賊一百餘人拼命衝突我
兵用連環鎗擊死賊匪三十餘人賊旋退去繞
赴附近之沙坪大壩等處屯聚維時竹園坪一
路之賊亦從獅子崖焚掠前來合會一處連紫
九營二十九日賊匪分出一股從羊橋壩鞍子
溝窺伺大寧縣城又分四股繞過青莊坪直撲
寶塔經臣劉君輔督率弁兵悉力堵住俟其撲

摧鎗礮並發擊死一百餘人騎馬賊一名該匪等相持一日夜並不稍退我兵人人奮勇殲斃賊匪數十名外委蔡大勇中鎗陣亡遊擊楊洪新面帶矛傷

臣

觀戒聞信立派遊擊朱進廷帶

領兵勇三百名星飛接應馬瑀亦從大寧派都司馮培元帶兵二百名馳往賊匪隨即驚竄官兵分路追剿割獲首級四十餘顆生擒賊匪張

必富會原臣禾貴等三名取供後卽行稟磔其
羊橋壩鞍子溝一股賊匪旋即退去而老木園
賊匪連日衝撲營卡自係知外匪已至急圖竄
合_臣觀成密派遊擊德清額署都司李寅等於
初三日夜帶領奮力兵勇暗襲賊人頭卡賊匪
驚覺拋擲火彈堆放擂石當經徐昭德遊擊愛
隆阿等督率官兵等一湧直上將守卡賊匪殲

斃三十餘人卽將頭卡奪佔賊匪退上轎頂山
據險抗拒官兵從此層層進逼四面環攻卽可
擣穴擒渠再_臣等欽奉

諭旨酌分鎮臣前往巴東一帶迎堵竄匪現在楚匪
分路竄近大寧蹤跡靡定堵剿正當喫緊酌擬
_臣劉君輔與鎮臣徐昭德留於大寧一路分投
剿賊鎮臣馬瑀係湖北襄陽鎮總兵呼應較靈

帶同副將白守忠抽帶官兵六百餘員名前往
巴東建始一帶探聽迎剿奏入

上命軍機大臣傳諭宜綿惠齡觀成曰大寧等處新
起教匪欲與老木園賊匪會合分擾青莊坪寶塔
等處營卡俱經官兵擊敗竄往沙坪大壩屯聚而
老木園之賊外援既絕勢益窮蹙自不致有東竄
但觀成等所辦祇係奪佔賊卡現在惠齡等帶兵

已至大寧務卽奮力剿殺不可再令他竄觀成等亦當乘賊勢窮蹙之時併力進攻擒拏首逆惠齡及觀成等兩處不拘何處先行剿竣卽行帶兵互相幫助此次打仗陣亡之外委蔡大勇著咨部加等議卹至所奏總兵馬瑀帶同副將白守忠帶兵六百名前赴巴東建始一帶係接奉前旨幫同堵剿芭葉山之賊今該處賊匪已竄回城口子經額

勒登保圍住所有馬瑀等帶領之兵正可由巴東
順流而下前赴明亮等軍營協剿

二十七日甲午景安奏言總兵王文雄現在鄧州

邊境駐防遵

旨挑集勁兵一千名於二十二日由新野起程馳往
明亮等一路協剿惟是南陽邊境一帶處處空
虛已飛催河北鎮總兵張文奇帶兵數百名迅

速前來一面飛咨山東撫臣伊江阿卽將前調
兵一千五百名先行派令將弁兼程前來南陽
邊界但兵到尙需時日現據探報賊匪直奔保
康後界坪後卽將來路挖斷茲因前面卡堵甚
嚴又不能從後界坪而退遂由冷坡壩旁竄其
勢欲犯房縣並接汪新咨稱此股賊匪甚衆鄧
州淅川新野唐縣等處均與襄鄖接壤臣現帶

標兵四百名已分撥鄧州新野防守城池卽河
北鎮兵到亦祇數百名臣於山東兵未到之前
惟有督率各屬多募鄉勇分佈防守以壯聲勢
仍不時偵探賊蹤趨向相機堵截奏入

上命軍機大臣傳諭明亮景安秦承恩汪新曰賊匪
由冷坡埡向西奔竄房縣一帶俱係曾經被賊之
處無可搶掠況係山僻小徑我兵易於圍剿竟是

賊匪自投陷阱前因賊匪北竄是以令王文雄帶兵前往迎頭截殺今賊匪竄往房縣該鎮若未能迎剿亦當向西南取道邀截至明亮等前奏由水路趕赴宜昌尙未得賊匪竄至南漳保康之信想一抵宜昌自己知賊匪西竄房縣明亮等卽可由宜昌自東南赴西北一帶取道邀截徑趨房縣與王文雄兩面夾擊再房縣距白河洵陽一帶甚近

而竹谿竹山又與商維接壤恐賊匪復思乘隙竄
陝秦承恩現在興安駐劄當就近親帶兵勇於漢
江以北擇要防堵勿使闖入再馬瑀帶兵前赴巴
東明亮等軍營協剿今賊匪已至房縣著該鎮就
近取路徑赴房縣迎剿更爲得力

上又命軍機大臣傳諭留京辦事王大臣曰豫省自
上年楚匪滋事以來各省官兵往來防剿所有供

支本省及協濟隣省糧餉等項需用浩繁現在派撥吉林索倫官兵前赴豫楚不可不寬爲儲備著怡親王儀郡王成親王慶桂傳齊在京之前鋒統領護軍統領親往內庫動撥銀一百萬兩解往備用

二十八日乙未額勒登保福寧奏言賊匪林之華

等現在帽子山城口子一帶苟延屯聚連日躍

探石柱嶺以下雙脊坪及石門崖等處路徑叢
雜該匪於十二日早間由石門崖直撲大合山

營卡經汪起率兵抵禦

臣

等聞信卽帶巴圖魯

侍衛官兵趕赴擊殺賊匪一百餘人乘勢卽將

石門崖賊卡搶得三處因賊滾木搗石齊下隨

卽擊卡

臣

福寧於十四日仍督兵在石門崖上

攻以分賊勢

臣

額勒登保於十三日至石柱嶺

下覓路進剿十四日五鼓帶同張廷彥薩克坦
布等由雙脊坪陡梯子一路進攻張順帶領弁
兵首先攀援而上黎明時連得雙脊坪賊卡二
座賊匪滾崖死者甚多生擒饒家華田祿方知
信等三名賊匪於雙脊坎上推墮木石官兵不
能遽上臣福寧是日在石門崖督率綸布春等
上攻直至午後賊人抵禦不住急竄懷抱窩我

兵奮力前進斃賊三十餘人當將賊卡二處燒
燬於卡內獲賊劉宗能王朝元二名覃王氏等
三口懷抱窩之賊據險擲石隨將官兵撤回

臣

額勒登保於十六七兩日繞至蜈蚣山夜遊山
等處另覓道路查得關騰慶溥等設立營卡俱
極嚴密但賊匪多在懸崖不能潛下而官兵亦
祇可對面用礮轟擊艱於進取

臣

額勒登保遂

於十八日仍回下麥莊將所獲賊匪饒家華各犯審訊據供林之華等因糧食無多山上新出包穀有限欲逃出此處再行糾集同教之人搶佔險峻大山踞守此時臣等所募營卡愈逼愈進賊匪日剿日減將軍成德因金雞口等處寧謐亦已來至鑼鍋圈防堵該匪萬難竄出卽或捨死衝突臣等亦必隨處帶兵趕殺勿使再有

他遁此處似可無須添兵所有惠倫等帶領之
東三省官兵及湖南撤回之湖北官兵已咨明
汪新囑令併赴歸州協剿

同日汪新奏言臣由東湖回駐荊州接據保康

縣馳稟本月初十日賊匪擾及縣境之張飛壩
署守備劉廷壘率領鄉勇連打二仗殺賊百餘
人賊匪奔退該備追殺二十餘里至板廟地方

賊夥猝起該備中矛陣亡賊卽撲入張飛壩直
至逢家山距縣不遠縣治四面皆山形如釜底
本無城郭上年被賊焚掠一空現在存兵三十
名居民不及百戶萬難守禦擬率兵民並將倉
穀監犯移向縣北大山站地方屯守又據南漳
縣馳稟賊衆現擾興山保康距該邑甚近查與
保康接界之關木山界山兩處山險路窄尙堪

扼守現集義勇三千餘名馳赴堵禦請速撥兵

協守等情

臣

查南漳西南緊接保康興山東北

與襄陽聯界此時賊匪已擾至保康勢必窺伺

襄陽約計前調叅將劉善承所帶標兵四百名

日內已抵襄郡因卽飛飭該將星夜馳赴擇要

駐守並飭該府縣趕募壯勇多名悉力嚴堵至

襄陽郡城及要隘各處業已集勇戒嚴

臣

日前

谷調南陽鎮兵五六百名卽日抵襄合之存城
現兵三百數十名似可力守無虞又據探報本
月十七日屯聚興山賊匪分股由楊家廟突向
霧渡河前後賊匪數千餘人分兩隊前來該處
兵勇悉力抵禦相持數刻賊勢兇悍卽衝過霧
渡河沿路居民倉惶躲避等情臣查霧渡河爲
宜昌當陽交界總徑而當陽東距荊郡亦止百

餘里郡城新固且有駐防滿營惟附近沙市地方係上下通津商販雲集之區實猶武昌之有漢鎮襄郡之有樊城臣以前撥駐守當陽接界之荆營滿兵四百名勢力尙單正在飭令道府激勸商民預爲團聚壯勇以期各保身家適接探報明亮德楞泰因聞賊勢東向業已統兵由大江直下途次聞知賊已衝過霧渡河恐南逼

宜郡明亮等卽分統弁兵由宜都取道前赴宜
昌德楞泰帶兵三千餘名仍由江程至荆相機
迎剿等情茲十九日辰刻德楞泰已抵荆郡與
臣晤商以賊已竄過霧渡河而明亮統兵由宜

昌迎剿賊必折而東避徑向當陽此路兵勇勢
單必須重兵迎頭截住一面飛咨明亮自後直
壓不特當陽迤東各境可免蹂躪而前後夾剿

亦易於得手刻下德楞泰已統原來官兵星速
進進所需糧餉軍火臣已趕緊撥發其郡城門
廂及附近水路總徑要隘亦經台設卡巡嚴密
盤察以防奸匪溷跡均奏入

上命軍機大臣傳諭明亮額勒登保德楞泰福寧景
安汪新曰昨據景安奏賊匪由南寧後界坪西向
房縣奔竄今汪新奏稱賊匪滋擾保康之張飛

地方該處逼近南漳自卽係由南漳竄往房縣之賊其由興山衝過霧渡河賊匪想必另係一股明亮已統兵前赴宜昌德楞泰帶兵已抵荊州卽日赴當陽截剿有此兩路大兵前後夾擊當乘此機會速剿完竣荊州沙市地方爲商賈輻輳之地本有荊州滿兵四百名在破防堵現在汪新又飭令道府激勵商民團集鄉勇幫同堵禦若德楞泰在當

陽截住竄匪自不至擾至沙市或賊匪仍從原路
折回竟向西北奔逃思與保康房縣一帶賊匪合
夥尤屬易辦其在張飛垭打仗陣亡之守備劉廷
壅著咨部加等優卹至南漳一股賊匪雖距襄陽
漸遠但亦不可不亟籌截剿王文雄帶兵一千名
不敷剿捕其帶領東三省官兵之惠倫愛星阿阿
哈保等以之領兵則有餘以之調度則不足現在

賊蹤離豫更遠著景安卽親赴襄樊一帶往來稽
查所有續調直隸山東官兵止須酌留數百名協
同河北鎮兵及河兵在漢江北岸南陽一帶擇要
堵禦其餘兵丁景安俱帶赴襄陽南漳一路督剿
惠倫愛星阿阿哈保等俱聽景安調度以期事權
歸一至額勒登保等本日奏報之摺祇係攻石門
崖雙脊坪賊卡尚未擒獲林之華殲賊不過百數

十名爲數亦少額勒登保福寧俱著傳旨嚴行申飭賊匪屢經官兵剿殺尙思乘間潛逃且該處崖壁險峻賊匪備積擣石抵死抗禦官兵亦斷無日久相持徒勞仰攻虛損兵力之理今賊匪既有欲逃竄他處之語曷若暗將官兵埋伏於賊匪圖竄去路故留路徑誘其逃出巢穴伏兵猝起正可趁勢圍擒生致首逆此亦不得已而思變計之意額

勒登保等或做照指示酌量可行與否亦不必拘
泥遷就總須設法將首逆擒獲若再似黃柏山芭
葉山任賊他竄則額勒登保又將何顏對朕耶至
覃加耀一犯前經得受鎗傷是否業已傷斃實在
下落若何摺內仍未奏及著查明據實具奏